


0 10 20 30 40 50 60 70 80 90 100 110 120 130 140 150 160 170

Inches  
1  
2  
3  
4  
5  
6  
7  
8  
9  
10  
11  
12

Centimetres



12674.08  
8973

**Kodak** Color Control Patches

1  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19  
20  
21  
22  
23  
24  
25  
26  
27  
28  
29  
30  
3  
12

陽

陽明先生年譜 冊 1 號 13698

陽明先生年譜

55094

陽明先生年譜

佳674.08  
8973

55094

4920.51  
1032

王陽明先生遺像



王陽明先生遺像

奉天承運皇帝制曰竭忠盡瘁固人臣職分之常崇德報功實國家激勸之典矧通侯班爵崇亞上公而節惠易名榮逾華衮事必待乎論定恩豈容以久虛爾故原任新建伯南京兵部尙書兼都察院左都御史王守仁維岳降靈自天祐命爰從弱冠屹爲宇宙人豪甫拜省郎獨奮乾坤正論身瀕危而志愈壯道處困而造彌深紹堯孔之心傳微言式闡倡周程之道術來學攸宗蓄蘊旣宏猷爲丕著遺艱投大隨試皆宜戡亂解紛無施弗效閩粵之箚巢盡掃而擒縱如神東南之黎庶舉安而文武足憲爰及逆藩稱亂

尤資仗鉞淵謀旋凱奏功速於吳楚之二月出奇決勝邁彼淮蔡之中宵是嘉社稷之偉勳申盟帶礪之異數旣復撫蠻兩廣旋致格苗七旬謗起功高賞移罰重爰遵遺詔兼采公評續相國之生封時而旌伐追曲江之歿卹庶以酬勞茲特贈爲新建侯諡文成錫之誥命於戲鐘鼎勒銘嗣美東征之烈券綸昭錫世登南國之功永爲一代之宗臣實耀千年之史册冥靈不昧寵命其承

隆慶元年丁卯五月誥命

昔華亭徐少師階督學江西於士人家摹得先生

燕居像二朝衣冠像一此則其朝像也徐少師嘗  
語人云此像於先生極肖予於吾里所見廟像亦  
然今後人仰慕先生每有不見古人之恨予特繪  
而傳之使學者能於有象之面目求其無形之性  
情則語言文字之外當自有遇之者

自公堂主人識

按自公堂主人俞麟字嵩菴爲陽明先生鄉人康  
熙癸丑刊先生全集於粵之從化卷首追繪遺像  
繫以隆慶誥命並於凡例中自識其緣起茲照原  
刻敬謹重摹增入斯編俾興起於百世下者開卷

無異親炙云光緒丙午閏四月皖巢後學劉原道  
謹誌

陽明先生年譜

先生諱守仁字伯安其先晉右軍將軍羲之之後  
世居山陰至二十三世迪功郎壽徒餘姚國初有  
綱者官廣東叅議死苗難其子彥達以羊革裹尸  
歸御史郭純上其事廟祀綱于增城綱蓋先生之  
六世祖也高祖與準永樂間舉遺逸不起號遯石  
翁曾祖世傑以明經貢入太學號槐里子祖天敘  
號竹軒封翰林院修撰自槐里子以下兩世皆贈  
嘉議大夫禮部右侍郎加贈新建伯父華號龍山  
繇進士及第第一人仕至南京吏部尚書封新建

伯龍山念山陰佳山水又爲先世故居復自餘姚徙越城之光相坊先生因築室陽明洞距越城東南二十里故學者稱爲陽明先生

成化八年壬辰九月三十日丁亥先生生先生在娠十四月生之夕祖母岑夢神人衣緋玉自雲中鼓吹送兒來驚寤已聞啼聲竹軒翁因名先生雲而鄉人遂指所生樓曰瑞雲樓

十二年丙申先生五歲猶不言有神僧過而目之曰好個孩兒可惜名字道破竹軒翁更以今名曰守仁卽能言嘗暗誦翁所讀書翁訝問之曰向聞祖

讀時已默記矣

十七年辛丑先生十歲龍山公舉進士

十八年壬寅先生十一歲竹軒翁因龍山公迎養攜先生如京師過登金山與客賦詩未就先生從旁占一絕客大驚復命賦蔽月山先生又隨口占一絕詩在集中明年就塾師於邸中一日與同學生走長安街遇相者曰吾爲爾相爾鬚拂領入聖境鬚至上丹臺結聖胎鬚至下丹田聖果圓先生感其言歸問師曰何爲第一等事師曰讀書登第先生曰恐未是當讀書作聖人耳



陽明先生年譜  
二十年甲辰先生十三歲太夫人鄭氏卒

二十二年丙午先生十五歲時石英王勇亂畿內石和尚劉千金亂秦中先生間行出居庸關逐健兒騎射徧詢夷落所以備禦之策經月始返夜夢謁漢馬將軍援廟賦詩一絕詩在集中先生感慨時事屢欲上書於朝龍山公格而止之

宏治元年戊申先生十七歲 七月自京師親迎夫人諸氏於洪都時諸公養和爲江西叅議先生就委禽焉合巹日偶行入鐵柱宮見道士跣趺卽而叩之相與對坐忘歸諸公遣人徧索不得明日先生始還 署中有紙數篋先生日學書皆盡書法

灑掃應對  
可悟精義  
入神正是  
如此

大進先生嘗曰吾始模古帖止得字形後凝思靜慮擬形於心久之始通其法及讀明道書曰吾作字甚敬非要字好只此是學既非要字好又何學也乃知古人隨時隨事只在心上學此心精明字好亦在其中矣後與學者論格物多舉此爲證

二年己酉先生十八歲 十二月以夫人諸氏歸餘姚舟過廣信謁婁一齋諒語格物之學先生甚喜以謂聖人必可學而至也後徧讀考亭遺書思諸儒謂衆物有表裏精麤一草一木皆具至理因見

竹取而格之沈思不得遂被疾

五年壬子先生廿一歲秋舉于鄉時聞中夜半見有二巨人者衣緋綠東西立大言曰三人好作事己而先生與孫中丞燧胡尚書世甯同舉及宸濠之變胡發其奸孫死其難先生平之

六年癸丑先生二十二歲春試南宮落第宰相李西涯素器先生戲曰待汝作來科狀元試爲來科狀元賦先生拈筆而就有忌者曰此子取上第目中無我輩矣及丙辰春試竟爲忌者所抑同舍有以不第爲恥者先生笑曰汝以不得第爲恥吾以不

便是大學問

得第動心爲恥

十年丁巳先生二十六歲寓京師時邊烽甚急詔舉將才無以應先生因精究兵法每遇賓飲聚果核列陣勢爲戲

十一年戊午先生二十七歲讀考亭上光宗疏有曰居敬持志爲讀書之本循序致精爲讀書之法乃悔前日用力雖勤而無所得者欲速故也因循序以求之然物理吾心終判爲二沈鬱既久舊疾復作聞道士談養生之說而悅焉

十二年己未先生二十八歲春舉南宮第二人賜二

先生所往無不成功其平日究心軍旅如此可見天下事無有不學而能者

陽明先生年譜  
甲進士第七人觀政工部先生爲諸生時嘗夢威甯伯王越遺以弓劍是秋奉命督造威甯墳馭役夫以什伍法休食以時暇則驅演八陣圖事竣威甯家謝以金帛不受出威甯夙所佩劍以贈適與夢符遂受之時星變下詔求言先生疏論邊務八事

十三年庚申先生二十九歲授刑部雲南司主事十四年辛酉先生三十歲奉命讞獄江北多所平反暇日遊九華山見道者蔡蓬頭問以仙術蔡曰尙未有頃先生屏左右再拜請問蔡曰尙未問至三

道者真是異人

蔡曰汝禮雖隆終不忘官相大笑而別地藏洞有異人坐臥松毛不火食先生歷巖險訪之值其睡先生默坐良久方醒問以第一義諦不答徐曰周濂溪程明道你儒家兩個好秀才也語畢復睡先生歸明日再往不復見矣

十五年壬戌先生三十一歲 八月予告歸越築室陽明洞行導引術友人王思輿等來訪先生命僕迎之且歷語其來蹟似先知者衆驚異以爲得道久之先生悟曰此簸弄精魄非道也遂屏去其術欲離家遠遊念祖母岑與龍山公在因循未決一

能不爲異道所惑非大智不能

陽明先生年譜  
日悟曰此念生于孩提此念亡是斷滅種性矣乃  
移居西湖往來南屏虎跑間有僧禪坐三年不語  
不視先生喝曰這和尚終日口巴巴說甚麼終日  
眼睜睜看甚麼僧驚起先生問其家對曰有母在  
曰起念否對曰不能不起念先生卽指愛親本性  
諭之僧涕泣拜謝挈鉢而歸

十七年甲子先生三十三歲秋主考山東鄉試試錄  
皆先生筆也 九月改兵部武選司主事

十八年乙丑先生三十四歲是年與湛甘泉若水定  
交共以倡明聖學爲事門人始進

正德元年丙寅先生三十五歲時奄瑾擅政南京科  
道戴銑薄彥徽等以諫忤旨皆下獄二月先生抗  
疏救之觸瑾矯旨廷杖四十謫貴州龍場驛驛丞  
二年丁卯先生三十六歲 夏赴謫至錢塘瑾遣人  
陰跡先生先生度不免佯爲自沉於江密附商船  
往舟山颶風大作一夕飄墮閩界比登岸山行數  
十里夜扣一寺僧故不納又趨野廟倚香案臥蓋  
虎穴也夜半虎但遶廊吼不敢入黎明僧意先生  
必斃於虎將收其橐此寺僧蓋素借虎以禦客者  
見先生方睡醒驚曰非常人也邀至寺則向與先

先生隨所至多遇異人如長安相者鐵柱宮道士九華山蔡蓬頭俱得其指點之力豈先生爲一代大儒故隨在有神人爲之呵護耶非尋常之士得冀幸一遇者

生跌坐於鐵柱宮之道士在焉道士笑出袖中詩相示有二十年前曾見君今來消息我先聞之句因問先生曰爾欲安往萬一瑾怒逮爾父誣爾北走湖南走粵奈何先生愕然著之得明夷乃決策返別道士留詩壁間詩在集中取間道絲武夷涉鄱陽往省龍山公於建業以十二月赴龍場驛時先生妹婿徐愛因先生將赴龍場納贄北面奮然有志於學

三年戊辰先生三十七歲 春三月至龍場驛龍場在貴州西北萬山中蛇虺蠱蟲畢聚夷人詈舌不

此所謂動心忍性增益其所不能

通語言可與通語言者僅中土亡命耳時瑾憾未釋先生自計得失榮辱俱忘惟生死一念尙在乃鑿石槲以俟命焉會從者皆病先生親析薪取水作糜飼之又爲歌詩調越曲雜談笑以相解悞因沈思聖人處此更有何道忽中夜大悟格物致知之旨不覺呼躍而起從者皆驚始知聖人之道吾性自足向之求理於事物者誤也默記五經之言證之莫不脗合著五經臆說夷人亦日來親見先生所棲卑溼爲構龍岡書院寅賓堂何陋軒君子亭玩易窩以居先生思州守遣人侮先生諸夷不

平毆之守怒白當道當道令先生詣謝先生不可  
致書復之守聞自失水西安宣慰餽梁肉給使令  
重以金幣鞍馬先生俱不受始朝廷議設軍衛於  
水西兼築城郭既而中止然驛傳尙存安惡據其  
腹心欲去之以問先生先生遺書申朝廷令甲威  
信安心乃折有宋氏酋長曰阿賈阿札者叛宋氏  
作亂先生復遺書諷諭安安悚然率所部平其難  
四年己巳先生三十八歲貴州提學副使席書聘先  
生主貴陽書院身督諸生師先生是年先生始論  
知行合一其說具語錄中

五年庚午先生三十九歲絲龍場驛丞陞廬陵縣知  
縣爲政七月不事威刑選三老里正諭民爲善多  
感化者 冬十一月入觀館於興隆寺時黃宗賢  
縮始見先生論學先生喜令與湛甘泉俱 十二  
月陞南京刑部四川司主事

六年辛未先生四十歲 正月調吏部驗封司主事  
始論晦庵象山之學有答徐成之書時方獻夫爲  
郎位在先生上敬執贄先生 二月爲會試同考  
試官 十月陞文選司員外郎

七年壬申先生四十一歲 二月陞考功司郎中

十二月陞南京太僕寺少卿便道歸省是年徐愛以祁州守遷南工部郎與先生同舟歸越論大學宗旨詳語錄

八年癸酉先生四十二歲 冬十月至滁州日與門人遨遊瑯琊釀泉間月夕環龍潭而坐者數百人歌聲振山谷舊學之士日益至

九年甲戌先生四十三歲 四月升南京鴻臚寺卿是年始專以致良知訓學者

十年乙亥先生四十四歲立從弟守信子正憲爲後時先生與諸弟守儉守文守章皆未舉子龍山公

爲擇守信子立之時年八齡 八月擬諫迎佛疏近侍言西域有僧能知三生事胡人謂之活佛遣宦者劉允乘傳往迎以珠琲爲幡幢黃金爲供賜賚巨萬勅允往反以十年期得便宜行事請鹽七萬引爲行李費輔臣楊廷和執奏不聽先生擬疏欲上後止 疏請告是年祖母岑太夫人年九十有六疏凡再上

十一年丙子先生四十五歲 九月升都察院左僉都御史巡撫南贛汀漳等處以兵部尙書王瓊舉也王思與語季本曰陽明此行必立事功吾觸之

不動矣 十月歸省至越

十二年丁丑先生四十六歲 正月至贛州先經萬

安有賊數百沿途劫掠商舟不敢進先生令聯商

艦結為陣勢揚旗鳴鼓若趨戰者賊懼羅拜呼曰

饑荒流民乞求賑濟先生令人諭之曰至贛後即

差官撫插各安生理毋作非為自取戮滅賊皆散

歸先生入贛日即選募民兵行十家牌法先是贛

人之在官府者皆洞賊耳目官府舉動賊必先聞

軍門一老隸作奸尤甚先生知之呼入密室使自

擇生死隸吐實先生許以不死試其言悉驗先生

今隨在皆  
如此惟明  
不足以燭  
奸多為左  
右所賣

以是盡得賊情矣 二月平漳寇 四月班師

時三月不雨先生駐軍上杭禱於行臺一雨三日

有司請名行臺之堂曰時雨堂 五月立兵符

奏設平和縣治於河頭移小溪巡檢司于枋頭

六月請疏通鹽法 九月改授提督南贛汀漳等

處軍務欽給旗牌得便宜行事先是先生申明賞

罰疏以旗牌便宜為請有笑其迂者獨王公瓊曰

朝廷此等權柄不與此等人又將誰與覆疏得旨

悉從之江西鎮守太監畢真謀於近倖請監其軍

瓊奏以為兵法最忌遙制若使南贛用兵必待謀

王晉溪立  
朝他無表  
見只此一  
節便堪不  
朽



賊之用心  
如此畢竟  
為先生所  
擒益見先  
生方畧之  
妙

於省城鎮守敗矣惟省城有警則聽南贛策應可也真謀乃寢 以平漳寇功陞俸一級賞銀二十兩文綺四端 十月平橫水桶岡諸寇賊首謝志珊就擒先生問之曰汝何得黨類之衆若此志珊曰亦不容易平生見世上好漢斷不放過必多方鈎致之或赴其難或周其急或逞其酒色嗜好待其懷德與之謀無不應矣先生顧謂門人曰吾儕求友之切亦當如是 十二月班師奏設崇義縣治于橫水增茶寮隘上堡鉛廠長龍三巡檢司

十三年戊寅先生四十七歲 正月征三泖 三月

收朋友之  
益者當如  
此用心

平大帽泖頭諸寇 四月班師立社學舉酒酬諸門人曰感諸君助我以此相報門人各矍然問故先生曰始吾登堂賞罰軍事嘗恐誤有愧諸君不敢不慎及退對諸君尙覺前之賞罰有未慊也直至登堂行事與諸君相對時此心恰恰如一始安此固諸君之所以助我矣 五月奏設和平縣治于和平峒改和平巡簡司于泖頭 六月以平橫水桶岡功陞右副都御史廕一子錦衣衛世襲百戶 七月刻古本大學 刻朱子晚年定論 八月門人薛侃刻傳習錄於虔徐愛所遺也愛卒先

生哭甚哀有前後祭文二篇 九月修濂溪書院

居四方學者 十月舉行鄉約 十一月再請疏

通鹽法

十四年己卯先生四十八歲 正月以平三洲功廢

一子錦衣衛世襲副千戶上疏辭免不允疏乞致

仕又不允以祖母岑疾亟也 六月奉勅勘處福

建叛軍初九日發贛州十五日至豐城聞甯王宸

濠反趨還吉安起義師濠遣兵追先生先生以計

得脫十九日至吉安上疏告變慮賊黨順流窺建

業犯京師兩都倉卒無備思以計給濠使遲留旬

月不出乃萬全於是僞爲兩廣軍門機密火牌僞

爲迎接京邊官軍公文僞爲李士實劉養正內應

書僞爲閔念四凌十一投降狀令雷濟龍光先後

設法故聞于濠濠乃疑懼猶豫其詳具反間遺事

中二十一日再上疏告變以叛黨方熾恐前疏不

得達也同日疏乞便道省葬 七月初五日疏上

宸濠誦訕檄榜十三日率伍文定等義師發吉安

十五日大會于樟樹遣奉新縣知縣劉守緒襲破

濠伏兵于新舊墳廠十九日發市汊二十日拔南

昌二十四日與賊戰鄱陽湖之黃家渡二十五日

戰于八字腦二十六日獲濠于樵舍江西平而朝廷不知也當是時始以南京都御史李克嗣飛章告急集廷臣會議廷臣猶觀望不敢斥言濠反獨兵部尙書王瓊曰豎子素行不義今倉卒舉亂不足慮王守仁據上游躡之成擒必矣但故事不得不命將乃疏請下詔削濠屬籍正賊名請命將出師趨南都命南和伯方壽祥防江都御史俞諫率淮兵翊南都王守仁率南贛兵繇臨吉都御史秦金率湖兵繇荆瑞會南昌李克嗣鎮鎮江許廷光鎮浙江叢蘭鎮儀真遏賊衝傳檄江西諸路但能

晉溪真不  
可及

如此布置  
亦好

倡義旅擒反者封侯時羣小導上親征有旨不必命將朕當親率六師奉天征討假威武大將軍鎮國公行事令太監張永張忠安邊伯許泰都督劉暉率京邊官軍萬餘以從給事中祝續御史張綸隨軍紀功 八月十六日上疏諫止親征是日再乞省葬 九月十一日發南昌獻俘如京師時張忠許泰等議欲使人以威武大將軍牌取逆濠放還湖中俟上親與之戰而後奏凱論功先生行至廣信忠泰使人邀還江西先生不聽乘夜過玉山草萍驛適張永候于杭先生見永謂曰江西之民

張永真內  
侍之傑然  
者然亦先  
生之至誠  
有以感之

久遭濠毒既經大亂繼以旱災又加以京邊官軍  
供應困苦不支必逃聚山谷爲亂昔助濠尙脅從  
耳今爲窮迫所激奸黨羣起天下將成土崩之勢  
公素委心朝廷得無念耶永曰然吾之此出爲羣  
小在側欲調護左右以默輔聖躬非爲掩功來也  
但皇上天性順其意猶可挽回萬一若逆之徒激  
羣小之怒無救于天下之大計矣先生信其無他  
以濠付之而稱病居西湖淨慈寺 十一月返南  
昌以奉勅巡撫江西也時忠泰等在江西百計搜  
羅續綸又望風附會肆爲飛語先生既還北軍肆

此正所謂  
知柔知剛  
非有大學  
問者不能

坐慢罵或故衝導起釁先生一不爲動愈待以禮  
密令居人移家于鄉而以老羸應門將犒賞北軍  
忠泰預禁其人令勿受先生傳示內外諭北軍離  
家苦楚居民當敦主客之禮每出遇北軍喪必停  
車唁慰厚與之糲嗟歎乃去久之北軍咸感會冬  
至節先生令城市設酒脯以奠死于亂者哭聲晝  
夜不絕北軍聞之無不思家泣下忠泰欲與先生  
較射意先生不能有以屈之先生勉應三發三中  
的北軍在傍哄然舉手嘖嘖忠泰大懼曰我軍皆  
附王都耶乃班師是年十二月二十六日上至南

都

十五年庚辰先生四十九歲上在南都忠泰既憾先生每矯旨召先生而先生不赴乃密譖于上云王守仁必反上問以何爲驗對曰試召之必不來正月有詔召先生張永使幕士錢秉忠密以報先生聞命趨至忠泰復拒之于蕪湖先生入九華山宴坐草庵中上陰遣人覘之曰王守仁學道人也安得反命還江西過開先寺刻石于讀書臺曰正德己卯六月十四乙亥甯藩濠以南昌叛稱兵向闕破南康九江攻安慶遠近震動七月十三辛亥臣

歸功于朝  
極得大體

守仁以別郡之兵復南昌宸濠擒餘黨悉定當此時天子聞變赫怒親統六師臨討遂俘宸濠以歸於赫皇威神武不殺如霆之震靡擊而折神器有歸孰敢窺竊天鑑於宸濠式昭皇靈嘉靖我邦國蓋世宗龍飛之兆徵于此矣豈先生能前知乎  
二月觀兵九江 三月請寬租 三疏省葬不允  
五月江西大水疏自劾 六月如贛大閱士卒  
教戰法江彬遣人來覘人皆爲先生懼先生作啾啾吟解之曰東家老翁防虎患虎夜入室銜其頭西家小兒不識虎持竿驅虎如驅牛門人陳九川

璫為募兵  
者法

思慮之深  
遠若此真  
是出於忠  
君愛國之  
心

等復以為憂先生曰昔在省城處權豎鎗鋒劍鉞  
間吾心帖然今公等何多慮也有言萬安多武士  
命叅隨往錄之諭曰但多營力不問武藝得三百  
人龍光問宸濠既平錄此何為先生笑曰交趾有  
內難出其不意搗之亦一機會也蓋是時上在南  
都宸濠尚未伏法而彬謀叵測故有牛首夜驚之  
事只畏先生不敢動耳先生之所以觀兵九江校  
士贛州錄萬安武力者其意固難為眾人道矣  
七月重上江西捷音疏時羣黨欲自獻俘襲功張  
永曰不可昔我等未出京時宸濠已擒王都堂獻

俘北上過玉山渡錢塘經人耳目不可假也於是  
以大將軍鈞帖令先生重上捷音先生乃節畧前  
奏入諸人姓名于內再上之 八月咨部院雪理  
冀元亨冤狀 閏八月初八日上在南京受俘十  
二日上自南京旋蹕霍韜曰是役也罪人已執猶  
動眾出師地方已甯乃殺民奏捷誤先朝於過舉  
搖國是於將危蓋忠泰之攘功賊義厥罪滔天而  
續綸之詭隨敗類其黨惡不才亦甚矣 四疏省  
葬不允先生在贛聞祖母岑太夫人訃及海日翁  
病欲棄職逃歸門人周仲曰先生思歸一念亦似

着相先生良久曰此相安能不着 九月自贛州  
還南昌時泰州王良服古冠服執木簡以二詩來  
見先生先生異其人降階延之上坐問何冠曰有  
虞氏冠問何服曰老萊子服問學老萊子乎曰然  
曰將止學服其服抑學其上堂詐跌也良心動坐  
漸側及論格物致知之旨言下豁然明日易服執  
弟子禮 十二月初三日上在通州賜宸濠死初  
八日上還京

十六年辛巳先生五十歲 正月居南昌錄陸象山  
子孫 三月十四日上崩於豹房 四月世宗登

如此宰相  
真可恨

極 五月集門人於白鹿洞 六月召先生馳驛  
來京二十日發南昌輔臣沮之陞南京兵部尙書  
叅贊機務先生行至錢塘上疏仍乞便道省葬  
八月至越 九月歸餘姚省祖塋訪瑞雲樓流淚  
久之蓋痛母生不及養祖母死不及斂也 十二  
月制封新建伯奉天翊衛推誠宣力守正文臣特  
進光祿大夫柱國兼南京兵部尙書照舊叅贊機  
務歲支祿米壹千石三代并妻一體追封給與誥  
券子孫世世承襲詔至日適龍山公誕辰先生捧  
觴爲壽公蹙然曰向甯濠之變皆以汝爲死矣而

不死皆以事難平矣而卒平讒構朋興禍機四發前後二年岌乎幾不免矣天開日月顯忠遂良父子濫冒封賞穹官高爵復相見於一堂豈非幸歟然盛者衰之始福者禍之基雖可幸亦可懼也先生洗爵而跪曰大人之教兒所日夜切心者也

嘉靖元年壬午先生五十一歲 正月初十日疏辭封爵不允 二月龍山公卒先生哭踊幾絕戒家人齋食百日未幾又令弟姪輩稍進乾肉曰諸子豢養習久強其不能是恣其作偽也不如稍寬之使各求自盡可矣先生久哭暫輟有弔客至侍者

眞摯之語  
動人肺腑

云宜哭先生曰哭發於心若以客至而始哭則以客退而不哭矣世人飾情行詐已久故于父母亦然 七月再疏辭封爵不報時御史程啟充給事中毛玉承宰相意倡爲異說劾先生門人刑部主事陸澄上疏爲六辯以折之先生聞而止之 九月葬龍山公於石泉山

二年癸未先生五十二歲 二月南宮策士以心學爲問陰闢先生門人徐珊不答而出門人錢德洪下第歸見先生先生喜而接之曰聖學從茲大明矣德洪曰時事如此此學何繇得明先生曰吾學



先生不與  
世爭是非  
亦只是實  
見得是耳

陽明先生年譜  
惡得徧語天下今會試錄出雖窮鄉深谷無不見  
矣吾學既非天下必有起而求真是者 九月改  
葬龍山公於天柱峯鄭太夫人於徐山因石泉有  
水患也 十一月與張元冲論二氏之學元冲曰  
二氏作用亦有功於吾儒者不知亦當兼取否先  
生曰說兼取便不是了聖人盡性至命何物不具  
何待兼取二氏之學皆我之學卽吾盡性至命中  
完養此身謂之仙不染世累謂之佛後世儒者不  
見聖學之全故與二氏成二見耳辟之廳堂二間  
共爲一室儒者見佛氏則割左邊一間與之見老

氏則割右邊一間與之而已則自處於中間皆舉  
一而廢百也

三年甲申先生五十三歲 正月越郡守南大吉見  
先生自陳其臨政多過問先生何無一言教我先  
生曰吾已言之久矣大吉未解先生問曰吾不言  
汝何以知對曰此某之良知也先生曰良知非我  
常言而何大吉笑謝而去越數日再來請曰某過  
後甚悔雖亟思改圖然不若得人預言不犯爲佳  
先生曰人言不如自悔真切越數日又來請曰身  
過可免心過奈何先生曰昔鏡未開明可以藏垢

今日居官  
者只少自  
悔二字先  
生此言堪  
爲炯鑒

今鏡明矣一塵之落亦難住脚此入聖之機也勉之 八月十五日宴門人於天泉橋是夜月白如畫門人百餘人酒酣各歌詩投壺擊鼓盪舟爲樂先生見諸生興劇退而作詩云鏗然舍瑟春風裏點也雖狂得我情明日諸生入謝先生曰昔孔子在陳思魯之狂士以學者沒溺富貴如拘如囚而莫之省有高明脫落者知一切俗緣皆非性體然不加實踐以入於精微則漸有輕滅世故闕畧倫物之病雖比世之庸瑣者不同其爲未得於道一也故孔子思歸以裁之今諸君已見此意正好精

詣力造以求至於道無以一見自足而終止於狂也錢德洪德周魏良政良器讀書城南遊禹穴諸勝忘返錢父問二魏曰得無妨課業乎二魏答曰觸處皆舉子業也曰朱說亦須理會否二魏曰以吾良知求晦翁之說譬之打蛇得七寸又何憂不得耶錢父疑未釋進問先生先生曰譬之治家學聖賢者其產業第宅服食器物皆所自置欲請客出所有以享之客去其物具在還以自享終身用之無窮也學舉業者專以假貸爲功欲請客自廳事以至供具百物莫不遍借客來雖一時豐裕可

觀客去則盡以還人一物非所有也若請客不至則時過氣衰借貸亦不備終身奔勞作一粿人而已是求無益於得求在外也明年乙酉魏良政發解錢父聞之笑曰打蛇得七寸矣時大禮議起霍兀厓席元山黃宗賢黃宗明問先生先生皆不答  
十月門人南大吉續刻傳習錄

四年乙酉先生五十四歲 正月夫人諸氏卒四月  
祔葬於徐山 六月先生服闋禮部尚書席書特疏薦曰生在臣前者見一人曰楊一清生在臣後者見一人曰王守仁 九月歸餘姚省墓會諸生

於龍泉寺之中天閣 十月立陽明書院於越城

五年丙戌先生五十五歲 聶豹以御史巡按福建渡錢塘來見先生喜謂思孟周程無意相遭於千載之下然豹是時尚以賓客禮見也後六年豹出守蘇州先生已下世四年矣語錢德洪王畿曰吾學誠得先生開發冀再見執贄不及矣茲以二君為證具香案拜先生稱門人 十二月庚申正億生繼室張氏出

六年丁亥先生五十六歲 四月鄒守益刻文錄於廣德州 五月起總督兩廣江西湖廣軍務征思

聶公亦一  
有志之士

識此可知  
道無內外  
動靜之別

公唐亦一  
大聰慧人

田 九月發越 五月過南昌先是先生舟次廣  
信門人徐樾方自白鹿洞學跌坐而來有禪定意  
登舟先生目而得之令舉似曰不是已而稍變前  
語曰不是此體豈有方所譬之此燭光無不在不  
可以燭上爲光因指舟中曰此亦是光此亦是光  
指舟外水面曰此亦是光樾唯唯明日至南浦百  
姓迎者謹呼塞途至不能行父老爭頂輿遞入都  
司先生命就謁者東入西出有不舍者出且復入  
自辰至未始散始舉有司常儀明日謁文廟講大  
學於明倫堂諸生屏擁多不得聞有唐堯臣者素

不信先生講學至是詐爲獻茶者得上堂傍聽驚  
曰三代以下安得有此氣象耶 十一月至梧州  
上謝恩遂陳膚見疏

七年戊子先生五十七歲 二月平思田 四月興  
思田學校 七月平八寨斷藤峽上經略思田及  
八寨斷藤峽事宜 九月以平思田功賞銀五十  
兩紵絲四襲 十月以疾疏請告不報謁漢馬伏  
波將軍廟于烏蠻灘宛然少時夢中所見也識二  
詩于其壁 謁增城先廟先生之六世祖綱以叅  
議死苗難者是也 十一月班師至大庾嶺先生

見得此心  
如此可以  
死矣終不  
死矣

疾已劇謂布政使王大用曰爾知孔明之所以托  
姜維乎大用遂擁兵護衛且爲敦匠事二十五日  
至南安門人推官周積來見先生起坐徐言曰近  
來進學如何積以政對遂問道體無恙先生曰病  
勢危亟所未死者元氣耳二十八日泊青龍鋪明  
日召積入開目視曰吾去矣積泣下問何遺言先  
生微哂曰此心光光地更有何言有頃瞑目而逝  
門人贛州兵備張思聰迎入南茆驛沐浴祔殮如  
禮 十二月初三日思聰與官屬師生設祭入棺  
明日輿襯登舟士民遠近遮道哭聲震地至贛士

民沿途擁哭如南安至南昌門人巡按御史儲良  
材提學副使趙淵請改歲行士民昕夕哭奠

八年己丑正月喪發南昌 時連日逆風舟不能行

趙淵祝于柩曰公豈爲南昌士民留耶越中子弟  
門人來候久矣忽變西風六日直至弋陽 二月

庚午喪至越時朝中有異議爵廕贈諡諸典皆不  
行方下詔禁僞學詹事黃綰上疏曰忠臣事君義  
不苟同君子立身道無阿比臣昔爲都事今少保  
桂萼時爲舉人臣取其大節與之交友及臣爲南  
京都察院經歷見大禮不明相與論列從此與萼

桂尊無良  
心一至於  
此亦只是  
起於一念  
之忌爲相  
臣者一有  
忌心便妨  
賢病國無  
所不至

二十餘年始終無間昨臣薦新建伯王守仁堪以  
輔導聖德蕙與守仁不合因不謂然小人乘間構  
隙然臣終不以此廢蕙平生也但臣於事君之義  
師友之道則有不得不明者夫臣之所以深知守  
仁以其功與學耳然功高而人忌學古而人不識  
此守仁之所以不容於世也蓋守仁之大功有四  
其一宸濠不軌謀非一日內臣如魏彬等嬖幸如  
錢甯江彬等文臣如陸完等爲之內應鎮守如畢  
眞劉朗等爲之外應故當時中外之臣多懷觀望  
若非守仁忠義自許不顧赤族之禍身任討賊之

事則天下安危未可知矣今乃皆以爲伍文定之  
功是輕發縱而重走狗也其二大帽茶寮泃頭桶  
岡諸賊寨勢連四省兵積累歲守仁臨鎮次第底  
定其三田州思恩構釁有年事不得息民不得安  
故起守仁以往使盧王之徒崩角來降感泣受杖  
遂平一方之難其四自來八寨爲兩廣腹心之疾  
其間守戍官軍與賊爲黨莫可奈何守仁假永順  
回兵盧王降卒襲而殲之易若拉朽凡此守仁之  
功皆除大患卒又以死勤事而甯可泯滅之乎其  
學之大有三一曰致良知致知出於孔子而良知

出於孟子何可異也一日親民卽百姓不親之親  
而凡親賢樂利與民同其好惡而爲絜矩之道者  
是也亦非創爲之說也一日知行合一蓋亦大易  
所謂知至至之知終終之只一事也守仁發此欲  
人言行相顧勿事空言是守仁之學正接孔孟之  
學而庸可非嘗之乎今萼以此詆守仁遂致陛下  
失此良弼使守仁不獲致君堯舜誰之過與故臣  
不敢以此爲萼是也夫以守仁之學之正如此其  
功之高又如此乃賞典不及削罰有加廢褒忠之  
舊恩倡爲學之新禁萼之所以輔明主者爲何如

哉今守仁客死妻子孱弱家童載骨藁埋空山鬼  
神有知當爲惻然況於人乎況於聖人乎假使守  
仁生于異世陛下猶當追崇之何至親見其人而  
失之也臣昔與守仁友二十年一日憤寡過之不  
能守仁從而覺之忽有深省遂師事之是臣於守  
仁實非苟然相信如世俗師友者也臣於君父之  
前處師友之間既有所懷不敢不盡昔萼爲小人  
所讒臣爲之憤旣而得白臣爲之喜固非臣之私  
也守仁今日之抱冤亦猶萼向日之負屈伏願擴  
一視之仁特勅所司優以卹典贈諡仍與世襲并

開學禁以昭聖德若此事不明則萼與臣終不能  
忘故臣敢直言如此所以盡事陛下之忠且以補  
萼之過也疏入不報 十一月葬先生於洪溪洪  
溪去越城三十里入蘭亭五里先生所親擇也先  
是後溪入懷與左溪會衝嚙右麓術者心嫌之夜  
有夢神人緋袍玉帶立於溪上者曰吾欲還溪故  
道明日雷雨大作溪泛忽從南岸明堂周闊數百  
尺遂定穴時門人會哭者千餘人四方來觀者皆  
涕泣歎息

隆慶元年丁卯五月詔贈先生爲新建侯諡文成

二年戊辰六月子正億襲封新建伯

萬歷十二年甲申詔從祀先生於孔子廟

陽明先生年譜終



按陽明先生年譜之作昉自明溫陵李卓吾贅析  
爲上下兩卷稍失煩碎嗣後刊先生集者必補錄  
年譜於卷首大率以溫陵爲先河惟互有增損莫  
衷一是茲刻參校諸本缺者補之訛者正之務期  
詳確而無凌雜俾學者先得綜觀先生之生平而  
後循其年而讀其書庶易曉然於聖賢入德之序  
云原道謹識於滬上之蟄廬



